

## Ningefanya Nini Zaidi?



### SABATO MCHANA

**Somo la Juma Hili:** *Yn. 18:37, Rum. 3:23–26, Rum. 5:8, Isa. 5:1–4, Mt. 21:33–39, Isa. 53:4, Rum. 3:1–4.*

**Fungu la Kukariri:** “Basi Pilato akamwambia, Wewe u mfalme basi? Yesu akajibu, Wewe wasema, kwa kuwa mimi ni mfalme. Mimi nimezaliwa kwa ajili ya haya, na kwa ajili ya haya mimi nalikuja ulimwenguni, ili niishuhudie kweli. Kila aliye wa hiyo kweli hunisikia sauti yangu” (Yohana 18:37).

**M**iaka kadhaa iliyopita, kisa cha mtoto mwenye umaizi kilichapishwa katika gazeti la *Guide*. Kisa hicho kinamzungumzia mvulana anayeitwa Denis, yatima aliyeishi na familia fulani kama mtoto wa kambo katika zama za kati. Denis alimchukia sana mfalme wa nchi yake kwa sababu, wazazi wake walipokuwa wagonjwa, askari wa mfalme walimchukua kutoka kwao, na hakuwaona tena. Baadaye tu ndipo alipojua kwamba mfalme aliwatenga ili kuwaepushia walio hai utisho wote wa Tauni Nyeusi. Ukweli kuhusu mfalme ulimweka Denis huru kutokana na chuki ambayo alikuwa ameiweka karibu maisha yake yote. Mfalme daima, na katika kila hali, aliwatendea kwa upendo watu wake.

Watu wengi leo wanamwona Mungu kwa kiasi fulani kama Denis alivyomwona mfalme. Uovu ambao walioushuhudia au kuupitia unawafanya wamchukie au kumkataa Mungu. Mungu yuko wapi wakati kuna mateso? Ikiwa Mungu ni mwema, kwa nini kuna uovu mwingi? Pambano la ulimwengu mzima linaelezea zaidi suala hili muhimu, lakini maswali mengi yanadumu kuwepo. Hata hivyo, wakati majaribio yetu yote ya kupata majibu yanaposhindwa kutosheleza, tunaweza kumtazama Yesu msalabani na kuona ndani Yake kwamba Mungu anaweza kutumainiwa, hata pamoja na maswali yote ambayo hayana majibu kwa sasa.

*\*Jifunze somo la juma hili kwa maandalizi ya Sabato ya Machi 15.*

**Kristo Mshindi**

Ingawa kuna adui kazini ambaye Kristo Mwenyewe anamrejelea kama “mtawala wa ulimwengu huu” (mwenye kujitwalia) mfalme wa kweli wa ulimwengu ni Yesu Kristo. Yesu anatushindia, na ndani Yake tunaweza kuwa na ushindi, hata katikati ya taabu na mateso. Hakika, kazi ya Kristo inampinga adui daima.

Tumeona kwamba Maandiko yanamwelezea Shetani kama:

(1) Yeye audanganyaye ulimwengu wote tangu mwanzo (Ufu. 12:9, Mt. 4:3, Yn. 8:44, 2 Kor. 11:3, 1 Yoh. 3:8).

(2) Mwongo na mshitaki wa Mungu na watu Wake mbinguni (Ufu. 12:10; Ufu. 13:6; Ayu. 1–2; Zek. 3:1, 2; Yuda 9).

(3) Mtawala mwenye kujitwalia mamlaka pasipo haki wa ulimwengu huu (Yn. 12:31, Yn. 14:30, Yn 16:11, Mdo. 26:18, 2 Kor. 4:4, Efe. 2:2, 1 Yoh. 5:19).

**Soma Yohana 18:37. Hili linatuambia nini kuhusu kazi ya Kristo kupinga udanganyifu wa adui? Inamaanisha nini kwamba Yesu ni Mfalme?**

Ingawa Maandiko yanafundisha kwamba Shetani ndiye mdanganyifu mkuu, msingiziaji/mzushi, mshitaki, na mtawala mwenye kujitwalia mamlaka bila haki wa ulimwengu huu, pia yanafundisha kwamba Yesu Ndiye mshindi dhidi ya Shetani katika kila njia.

(1) Yesu alikuja “‘ulimwenguni, ili aishuhudie kweli’ ” (Yn. 18:37),

(2) Kupitia msalaba, Yesu alidhihirisha kwa namna bora kabisa haki na upendo mkamilifu wa Mungu ( Rum. 3:25, 26; Rum. 5:8 ), na hivyo kukanusha madai ya Shetani ya uongo (Ufu. 12:10, 11), na

(3) Hatimaye Yesu ataharibu ufalme wa ibilisi, ambaye “ ‘anajua ya kuwa ana wakati mchache tu’ ” (Ufu. 12:12, linganisha na Rum. 16:20), na Kristo “ ‘atamiliki hata milele na milele’ ” (Ufu. 11:15).

Hatimaye, haidhuru Shetani anafanya nini, yeye tayari ni adui aliyeshindwa, na kilicho muhimu kwetu ni kudai ushindi wa Kristo kwa ajili yetu sisi wenyewe kila siku, kila saa na pia kudai ahadi ambazo msalaba umetupatia.

**Katika pambano kuu, tunajua ni upande upi unashinda. Kwa vipi chaguzi zetu za siku kwa siku zinaathiri upande ambao hatimaye tunaishia? Tunawezaje kuhakikisha kwamba tuko upande unaoshinda hata wakati huu?**



## Mwenye Haki na Mwenye Kumhesabia Haki

Daima, kazi ya Kristo inabatilisha kazi ya ibilisi. Na, kwa mujibu wa 1 Yohana 3:8, Yesu “alifunuliwa kwa kusudi hili, azivunje kazi za Ibilisi” (1 Yoh. 3:8) na “kumharibu yeye aliyekuwa na nguvu za mauti, yaani, Ibilisi” (Ebr. 2:14). Hata hivyo, kushindwa kabisa kwa utawala wa adui kunatokea katika hatua mbili. Kwanza, kupitia kazi ya Msalaba, Kristo anakanusha madai ya uongo ya Shetani. Na, baadaye, Shetani na ufalme wake wataharibiwa.

**Soma Warumi 3:23–26 na Warumi 5:8. Aya hizi zinafunua nini kuhusu jinsi Kristo anavyoshinda madai ya Shetani?**

---

Kama tulivyoona, adui anadai kwamba Mungu si mwenye haki na mwenye upendo kabisa. Hata hivyo, katika Kristo, Mungu anatoa udhihirisho bora kabisa wa haki na upendo wa Mungu, na alifanya hivyo kwa njia ya Msalaba.

Baada ya kifo cha Yesu, “Shetani aliona kwamba hila zake zote zimefichuliwa. Utawala wake umefunuliwa wazi kwa malaika waaminifu na kwa viumbe wa mbinguni. Alikuwa amejidhihirisha mwenyewe kuwa muuaji. Kwa kuimwaga damu ya Mwana wa Mungu, amejing’oa mwenyewe kutoka katika fadhili za wakazi wa mbinguni.”—Ellen G. White, *Tumaini la Vizazi Vyote*, Sehemu ya Pili, uk. 375, 376.

**Soma Ufunuo 12:10–12 kwa kuzingatia Mwanzo 3:15. Aya hii inafafanua zaidi umuhimu wa ushindi wa Kristo Msalabani kwa ulimwengu mzima?**

---

Historia ya ukombozi inatupatia uthibitisho wa kutosha ili tuwe na uhakika kwamba siku zote Mungu anafanya kazi ili hatimaye alete yaliyo mema kwa wote wanaohusika. Mungu wa Maandikō daima anatenda lililo jema na linalopendeza, kutokana na njia anazoweza kutumia katika pambano kuu (Kum. 32:4, 1 Sam. 3:18, Zab. 145:17, Dan. 4:37, Hab. 1:13, Ufu. 15:3, Mwa. 18:25).

Kwa nini udhihirisho wa haki na upendo wa Mungu katika pambano la ulimwengu mzima ni muhimu sana? Unapotafakari juu ya Msalaba na kazi zote za Mungu katika mpango wa ukombozi, ni kwa namna gani kazi za Mungu zinakupa ujasiri katika upendo wa Mungu, hata katikati ya majaribu na mateso?

## Wimbo wa Mpenzi Wangu

Kwa njia za kushangaza, Mungu ameuadhihirisha upendo na haki Yake katikati ya pambano la ulimwengu mzima. Hata hivyo, huenda wengine wakauliza, *Je, Mungu alipaswa kufanya zaidi ya alivyofanya ili kuzuia nalau kuondoa uovu?* Tumeona mfumo wa pambano la ulimwengu ambao unaonesha kwamba Mungu amechukua hatua ili kuheshimu uhuru wa kuchagua unaohitajika kwa ajili ya ustawi mkubwa wa uhusiano wa upendo kati Yake na wanadamu. Zaidi ya hayo, ni dhahiri amechukua hatua ndani ya vizuizi vya kimaadili, au masharti ya pambano, ndani ya muktadha wa pambano la ulimwengu wote juu ya tabia Yake, linaloweza kuamuliwa tu kwa udhihirisho wa upendo Wake.

**Soma** Isaya 5:1–4. Nani anazungumza katika aya hizi? Isaya anamzungumzia nani? Mwenye shamba la mizabibu na shamba la mizabibu wanawakilisha nani? Nini umuhimu wa yale aliyotenda mwenye shamba kwa sababu ya shamba la mizabibu? Matokeo ni nini?

Katika aya hizi, Isaya anaimba wimbo wa mpenzi wake, shamba la mizabibu. Mwenye shamba la mizabibu ni Mungu Mwenyewe, na shamba la mizabibu linawakilisha watu wa Mungu (tazama, kwa mfano, Isa. 1:8, Yer. 2:21). Lakini madokezo hapa yanaweza pia kuelezewa kuhusishwa na kazi ya Mungu iliyoenea katika ulimwengu huu. Kulingana na aya hizi, mwenye shamba la mizabibu (Mungu) alifanya kila kitu kwa kiwango cha kutosha ambacho kingeweza kutarajiwa ili kuhakikisha shamba Lake la mizabibu linastawi. Shamba la mizabibu lilipaswa kuzaa zabibu nzuri, lakini lilizaa tu “zabibu-mwitu,” ambazo tafsiri nyinginezo hurejelea “zisizo na thamani.” Kwa kweli, maneno ya Kiebrania hapa yanaweza kutafsiriwa kihalisi kama *tunda linalonuka*. Shamba la mizabibu la Mungu linazaa zabibu zilizoza.

Isaya 5:3 inahamia kwa Mungu Mwenyewe akizungumza, akiwaalika watu “kuamua” kati Yake na shamba Lake la mizabibu. Na, katika Isaya 5:4, Mungu Mwenyewe anaweka wazi swali muhimu kabisa: “Je! Ni kazi gani iliyoweza kutendeka ndani ya shamba langu la mizabibu nisiyoitenda? Basi, nilipotumaini ya kuwa litazaa zabibu, mbona lilizaa zabibu-mwitu?” Angeweza kufanya nini zaidi? Inavutia sana kwamba hata anawauliza wengine kuamua kile alichofanya.

Unapoutazama msalaba, Mungu alipojitoe kama dhambi kwa ajili ya dhambi zetu zote, ni kwa vipi maneno Yake, “Je! Ni kazi gani iliyoweza kutendeka ndani ya shamba langu la mizabibu nisiyoitenda?” yanachukua umuhimu wa kushangaza?



## Mfano wa Kristo wa Shamba la Mizabibu

Harika mfano wa mwenye shamba la mizabibu, katika Mathayo 21, Yesu anaendelea pale Isaya 5 ilipoishia, akitoa ufafanuzi zaidi juu ya tabia na matendo ya mwenye shamba la mizabibu kwa sababu ya shamba lake la mizabibu.

**Soma Mathayo 21:33–39 ukizingatia hasa swali la Isaya 5:4. Angeweza kufanya nini zaidi ya kile alichofanya?**

Sehemu ya kwanza ya mfano wa Kristo inanukuu moja kwa moja wimbo wa Isaya 5 kuhusu mwenye shamba na shamba lake la mizabibu. Kisha, Yesu anaongezea, mwenye shamba la mizabibu “alipangisha” shamba lake la mizabibu “kwa wakulima, akasafiri” (Mt. 21:33). Lakini, wakati mwenye shamba alipotuma watumishi Wake (manabii) mara mbili kukusanya mazao, wale waliokodisha shamba Lake la mizabibu waliwapiga na kuwaua watumishi Wake (Mt. 21:34–36). Hatimaye, alimtuma Mwanawe (Yesu), akisema “Watumstahi mwanangu” (Mt. 21:37). Lakini walimwua Mwanawe pia, wakisema, “Huyu ni mrithi. Njoo, haya na tumwue na tuutwae urithi wake.” Wakamkamata, wakamtupa nje ya shamba la mizabibu wakamwua” (Mt. 21:38, 39).

Angeweza kufanya nini zaidi? Baba alitupenda sana hata akamtoa Mwanawe mpendwa (Yohana 3:16). Ikiwa pambano la ulimwengu ni la aina iliyodokezwa hapa, lisingeweza kuamuliwa mapema kwa kutumia uweza wa kiungu bali lilihitaji kwanza udhihirisho wa hadhara wa tabia ya Mungu. Udhihirisho huu umewekwa wazi hatimaye katika kazi ya Kristo (Rum. 3:25, 26; Rum. 5:8). Tungeomba nini zaidi ya kwamba Mungu (katika Kristo) ajitoe mwenyewe kufa kwa ajili yetu, ili apate kutuhesabia haki pasipo kwa njia yoyote kuhatarisha haki na upendo Wake mkamilifu?

Tukio la msalaba linadhihirisha kwamba Mungu amefanya kila kitu ambacho kingeweza kufanywa ili kupunguza na kuondoa uovu, lakini bila kuharibu muktadha kwa ajili ya ustawi wa upendo wa kweli. Kama kungekuwa na njia yoyote iliyo bora zaidi kwa Mungu, je, asingeichagua? Wakati watu wanateseka sana katika pambano hili la ulimwengu mzima, Mungu Mwenyewe anateseka kuliko wote. Tunapoutazama Msalaba, tunaweza kuona, kwa hakika, mateso na maumivu ambayo dhambi imemletea Mungu Mwenyewe. Hata hivyo, uhuru ulio ndani ya upendo ulikuwa mtakatifu mno kiasi kwamba Kristo alikuwa tayari kustahimili jambo hilo kwa ajili yetu.

**Soma Isaya 53:4. Kristo alichukua “masikitiko” na “huzuni” za nani pale msalabani? Hili linapaswa kutuambia nini kuhusu yote Mungu aliyotutendea na kile wokovu ulichomgharimu?**

## Kulithibitisha Jina la Mungu

Hatimaye, jina la Mungu linathibitishwa katika kila njia. Kupitia kazi ya Baba, Mwana na Roho Mtakatifu katika mpango wa ukombozi, haki kamilifu na upendo wa Mungu vinadhihirishwa pasipo shaka yoyote (tazama Rum. 3:25, 26; Rum. 5:8).

**Soma Warumi 3:1–4 kulingana na Isaya 5:3, 4. Hili linafundisha nini kuhusu Mungu Mwenyewe kuthibitishwa katika pambano la ulimwengu mzima?**

---

Katika Warumi 3 na Isaya 5, tunaona kwamba Mungu (kwa maana fulani yenye mipaka) anawaalika viumbe tu kuamua tabia Yake, ingawa hatuna haki au hadhi ya kufanya hivyo. Hatimaye, “vitabu” vyote vitakapofunguliwa, tutaona uthibitisho wa kwamba Mungu ni mwenye haki na mwadilifu kikamilifu. Mungu atajithibitisha Mwenyewe mbele ya viumbe vyote wenye akili.

**Soma Ufunuo 15:3 na Ufunuo 19:1–6. Aya hizi zinafundisha nini kuhusu kuthibitishwa kwa jina la Mungu mwishoni?**

---

Pote katika Maandiko, Mungu anaguswa sana na jinsi jina Lake lilivyotendewa. Kwa nini? Huwezi kuwa na uhusiano wa kina wa upendo na mtu ambaye tabia yake unaichukia au huiamini. Ikiwa mtu alimwambia mwenzi wako au mwenzi wako mtarajiwa uongo wa kutisha juu ya tabia yako, utafanya uwezavyo kupinga madai hayo yote, kwa maana madai kama hayo yakiaminika, yanaweza kuvunja uhusiano wako wa upendo.

Hatimaye, Mungu anathibitishwa pale msalabani na kupitia mpango mzima wa ukombozi. Katika hukumu ya upelelezi, Mungu anathibitishwa mbele ya ulimwengu unaotazama.

Kisha, katika hukumu ya mwisho wakati ambapo waliokombolewa hata “watawahukumu malaika” (1 Kor. 6:2, 3), Mungu anathibitishwa, kwa kuwa waliokombolewa wamepewa fursa ya kupitia kumbukumbu na kujionea wenyewe kwa nini Mungu ametenda alivyotenda, na kwamba hukumu zote za Mungu daima zimekuwa za haki na upendo kikamilifu. Ni nani kati yetu ambaye hana maswali mengi yanayohitaji kujibiwa? Kabla ya yote kukamilika, maswali hayo yatajibiwa (tazama 1 Kor. 4:5).

Hatimaye, kila goti litapigwa na kila ulimi utakiri kwamba Yesu ni Bwana (Flp. 2:10, 11). Haya yote ni sehemu ya uthibitisho wa tabia ya Mungu.



**Jifunze Zaidi:** Soma Ellen G. White, "The Reward of Earnest Effort (Thawabu ya Juhudi za Dhati," uk. 285–288, katika *Testimonies for the Church*, vol. 9.

"Yote yaliyotutatanisha kuhusu majaliwa ya Mungu yatawekwa wazi katika ulimwengu ujao. Mambo yaliyo magumu kueleweka yatafafanuliwa wakati huo. Siri za neema zitafunuliwa mbele yetu. Ambapo akili zetu zenye ukomo zilipotambua machafuko tu na ahadi zilizovunjwa, tutaona upatanifu mkamilifu na mzuri zaidi. Tutajua kwamba upendo usio na kikomo uliamuru uzoefu ambao ulionekana kuwa wenye kujaribu zaidi. Tunapotambua utunzaji mwema wa Yeye afanyaye kazi pamoja na wale wampendao katika kutupatia mema, tutafurahi kwa furaha isiyoelezeka na iliyojaa utukufu."—Ellen G. White, *Testimonies for the Church*, vol. 3, vol. 9, uk. 286.

### Maswali ya Kujadili:

① Je, umetatanishwa katika kujaribu kuelewa majaliwa ya Mungu? Inakufariji kwa namna gani kujua kwamba mambo hayo yote yatawekwa wazi hatimaye?

② Tafakari kile Kristo alichocha ili kuwa mwanadamu na kufa kwa ajili ya ulimwengu huu. Tafakari zaidi juu ya kile hili linachotuaambia kuhusu upendo wa Mungu na kama Mungu anaweza kutegemewa. Angeweza kufanya nini zaidi?

③ "Jina" la Mungu lina umuhimu gani? Hili lina maana gani kwetu sisi tunaajiita Wakristo? Ni kwa njia zipi Wakristo wakati mwingine wameliletea sifa mbaya jina la Kristo, na tunaweza kufanya nini katika jamii zetu mahalia ili kuwaonesha watu kumfuata Kristo kunavyofanana kwa vitendo?

④ Hatimaye, hata "majibu" yetu bora kabisa kuhusiana na tatizo la uovu yana upungufu kwa sasa. Tunaweza kufanya nini kwa vitendo ili kuwakaribia wale wanaoteseka na kuwa mawakala wa kupunguza mateso katika ulimwengu huu tunapongojea suluhisho la mwisho, la matukio ya wakati wa mwisho wa historia kwa tatizo la uovu ambalo ni Mungu pekee awezaye kuleta?

⑤ Tafakari zaidi Isaya 53:4, juu ya ukweli kwamba Kristo aliibeba "masikitiko" na "huzuni" zetu. Ni nini kilifanyika kwa shirika pale Msalabani kinachotusaidia kuelewa mpango wa wokovu na kilichomgharimu Mungu kutuokoa?